

石中英先生

錄音段落：09

時間長度：9 分 33 秒

Accession No. YP024

時間	受訪者 / 訪談員	內 容
00:00	訪談員：	今日呢係 2011 年嘅 10 月 8 號星期六，而家係下晝三點四十五分，咁我呢，而家喺呢個灣仔石中英先生嘅辦公室呢，就訪問阿石先生，今次呢係第四次嘅訪問嘞。噏，石生，就 er...上一次呢，你提到呢，就喺批托嘅時候呢，去到...後期，你就唔再批托嘞，跟住你有一個感觸，你就話呢，你覺得自己呢，係用一個錯誤嘅嘢，去批判呢另外一樣錯誤嘅嘢。
00:43	受訪者：	(笑)
00:44	訪談員：	噏，被批判嘅錯誤嘅嘢呢，咁好明顯就係托派，但係你話一個錯誤錯嘅嘢，可唔可以具體講下呢？呢個錯誤嘅嘢係咩嘢嚟呢？
00:56	受訪者：	噏，其實就係咁樣樣，即係個事情應該咁樣睇呀，我覺得呢，本身，作為一個...批托，或者批判托洛斯基主義派別，本身嚟講呢，係一定會有入做嘅，就算唔係我做，都有啲人做，點解呢？因為佢係...喺一個所謂 er...左派，或者係社會主義派別裏便嚟講呢，好多人係會將佢混淆㗎，同所謂 er...即係列寧式嘅 er...左派㗎，或者係毛澤東式嘅毛派㗎，或者托洛斯基式嘅托派㗎，係...係有個混淆嘅，咁所以就...特別我已經講呢，我開始做一件功夫呢，就係發現我喺啲工人呀，即係香港一啲工人呀、學生示威隊伍入便呢，點解有人揸啲紅旗呀，用一啲咁嘅革命嘅言論嚟講呢，咁嘅時候我自己覺得本身呢，我有做錯嘅一件事，應該要將呢個...呢兩個、幾種派別係識...識別㗎出嚟，咁問題識別㗎出嚟之後呢，你所謂批托本身，你梗係用一啲原則，嚟批判一啲原則，咁你點批判呢咁樣，好嘞，咁呢件事本身嚟講呢，大家都應該知道㗎，托洛斯基

係同列寧呢，係所謂一齊十月革命嘅功臣，咁但係列寧好早死咗之後呢，就係同史太林嘅矛盾呀，就跟住就出走，吓，或者被人趕，咁樣，咁...咁跟住呢，但就...背叛第三國際所謂，就成立第四國際，咁所以你批判嘅時候呢，就會將...即係經常會將列寧嘅一啲話，更多係將史太林嘅話，嚟批判托洛斯基講嘅嘢，同埋你會將所謂第三國際原則，嚟批判第四國際嘅嘢，噏，咁就出現咗一啲問題嘞，咁呢個即係話...我哋覺得咁樣係啱嘅情況，自己行咗先，咁樣批判佢啦，但係如果你發覺，如果史太林嘅嘢係錯嘅，或者第三國際嘅嘢係錯嘅，咁你係咪拎啲錯嘅嘢去批判啲錯嘅嘢呀？呢個就係我...即係到後期一個...個 **confuse** 就係咁嘞，噏，舉例，就好似呢，我當時批判托洛斯基主義或者個派別呢，即係國際托派最多嘅呢，係會應用《聯共黨史》，咁《聯共黨史》本書本身就係講史太林編著嘅，咁佢...實際上佢會將好多同佢意見唔啱嘅人呢，都會變成一種托派，其實根本就可能唔係托派，係將佢打成托派，好嘞，又舉例，喺中國革命歷史上便啦，即係我哋話 **er**...第三國際，或者係毛澤東等等，原來我發...最初我睇中共...研究中國托派呢，嘩！原來中國托派好多人㗎㗎，陳獨秀又係，**er**...收扃...胡風，清黨胡風又係，總言之就好多都係托派，咁所以我整整下就發覺原來根本呢，可能批派只係一個...虛有嘅名詞，總言之一種反對左...所謂傳統正宗啲啲，就叫做托派，咁個情況就...我發覺呢，我自己有啲 **er...confuse**，即係有啲混亂咗嘞。

04:23 訪談員： 即係你未必真係托派，佢只係反對派，就被扣上托派嘅帽子。

04:26 受訪者： 噏（是），佢只係反對派，係嘞，所以變咗好多時呢就變咗，托派頂帽，就扣咗上人咁個頭嘅度，咁問題就喺度嘞，即係如果我嘅能力係唔能夠識別到呢樣嘢，或者我用一種...佢係所謂批托嘅嘢，呢種嘢本身係錯嘅，佢根本就將唔同嘅意見變成一種批判嘅派別嘅啫，咁呢個用個武器係錯，批判嘅嘢都係錯嘅，咁雖然呢我係...而且覺得呢，亦都有個混亂就係特別係文化大革命嘅結束之後呢，即係毛澤東逝世，76年，

到四人幫被捉，到鄧小平出嚟，又要咩...搞改革開放，呢個階段上呢，我諗我到咗 77 年、78 年我就要停止咗呢個...繼續批托嘅文章，其中一個原因就是...你發覺呢，原來托洛斯基主義裏便成日講不斷革命論呀，可能文化大革命就係 apply 咗呢樣理論呀，即係如果...講得好話唔好聽就係毛澤東本身，如果你話不斷革命論係...托洛斯基主義嘅精華，可能毛澤東都係用咗呢樣嘢，或者四人幫，張春橋、姚文元等人都係用咗呢樣嘢，咁你咪...即係好...好搞笑？係咪先？咁即係話呢...即係我覺得呢，即係覺悟一樣嘢呢，就係...原來...可能我哋個...我自己本身個能力係有限嘅，我理解個能力亦都有限，原來真理呢，只係...一個局部嘅真理，冇永恆嘅真理，咁呢樣所謂批判嘅嘢呢，我覺得 er...我已經做咗嘞，做過，亦都分清楚，亦都係將佢兩...其實只有...唔係批唔批，只係將兩種嘅理論呢係分清楚，派別有啲分到清，有啲亦都分唔清，吓話，咁呀人亦都好似香港托派，邊啲人自己認自己托派，革馬盟，第四國際，吓嘛，等等，我亦都做咗呢樣嘢嘅識認，嘅工作，呢樣嘢我覺得我已經夠嘞，我有咁嘅能力亦都唔需要花好大嘅精力呢，係繼續進行呢樣嘅研究，所以我係毫不...可惜地，即係將我寫呢啲二十萬字嘅、就快付印嘅小冊子呢，我係一把火燒咗佢，因為我...因為發覺呢，我唔希...唔希望有任何嘅毒素，係加畀...謬誤呀，係加畀第二個人，同埋呢，亦都令呢樣...呢樣呢個行動亦都以後呢，對呢啲所謂真理嘅研究，即係我會係繼續研究各方面嘅理論呀學說等等，但係我對所謂真理研究呢，我應該用一種相對嘅觀點去睇，即係喺呢個階段上可能係正確嘅，喺下一個可能佢係錯誤嘅，咁呀相對，就唔係用一個好偏激，好 emo...或者好 emotional，好情感澎湃式嘅所謂批判呀，咩嘅做法，係個人呢，令到自己係要比較冷靜啲，一個距離嘅觀察，我覺得呢個係...其實係說明一種成長，即係自己嘅一種成長，同最初嘅衝勁，覺得呢種係錯嘅，即係好似魯迅寫嘅〈答托洛斯基的一封信〉，佢要批判、識別，到後期，我覺得我亦都有做錯，我亦都好真心做呢件事，我唔係為自己私利做，但係到到一個階段我覺得呢，我應該成長到另一個階段上嘞，我更加要...其他學術嘅研究我進行，但係應該保

持一個...比較距離嘅觀察，亦都唔係嘩！我係啱嘅，你係錯嘅，我永遠啱，你永遠係錯，即係唔係咁樣，非敵即友呀，非...唔係我族類呀就一定排外呀，呢種思想，咁我...喺呢個層次嚟講，我覺得 er...我係能夠 er...成熟咗一步嘅。

08:23 訪談員： 但係你係就放低枝筆以後都唔寫㗎啦㗎。

08:26 受訪者： 係呀，我放低咗枝筆之後呢，er...評論嘅文章冇寫，亦都散文亦都有寫，我自己...幾十年後我發覺呢個樣嘢呢，我...唔能夠叫自己係停筆，我只話係擱筆，就擱置枝筆，因為我當時覺得 er...我當時都已經寫咗好多嘢嘞，雖然唔算人哋啲咩真係幾呀萬字啲咩，即係我唔係話寫到...都未...我而係覺得生命呢係唔係好長嘅，咁我應該用我自己嘅生命去做一枝筆，吓，呢個地球做一張紙，咁我而係寫我嘅字，我嘅字呢，我某某文章就係我所創造嘅嘢，咁所以亦都有後期我點解會創辦一啲嘅...生意啦，吓，或者做旅遊呀，做工業啲咩，其實都係一篇篇嘅文章，係用生命去寫出嚟嘅。

09:24 訪談員： 即係轉去另一個方向，唔係用筆嚟寫嘞。

09:28 受訪者： 係嘞，唔用筆，嘎（是）。

（本段結束）